

Umsögn um leiðbeiningar fyrir sveitarfélög varðandi samráðshópa og notendaráð um málefni fatlaðs fólks

Þjónustusvæði Suðurlands í málefnum fatlaðra hefur verið með starfandi notendaráð frá árinu 2012. Þó nokkrar breytingar hafa átt sér stað á fulltrúum þess en í upphafi voru fulltrúar frá hagsmunasamtökum, notendum og fulltrúi frá þjónustusvæðinu. Í dag eru fulltrúar notendaráðs 9 og allir notendur. Verkefnastjóri símenntunar fatlaðs fólks heldur utan um ráðið.

Þjónusturáð og fagteymið á Suðurlandi hefur farið yfir leiðbeiningarnar og telur þær mikilvægar en skýra þurfi nokkur atriði.

Að okkar mati þarf að útbúa leiðbeiningar fyrir notendaráð um hvernig slíkur vinnuhópur vinnur saman á árangursríkan hátt, þannig að sjónarhorn allra fulltrúa fái vægi. Um er að ræða hóp fólks með ólíkar skerðingar og mismunandi sjónarhorn og forsendur til að fjalla um mál og taka afstöðu. En sjónarhorn allra er mikilvægt. Hafa ber í huga að stærstur hluti notenda þjónustunnar er fólk með þroskahömlun og mikilvægt er að gæta þess í hvívetna að þeir séu sjálfir fulltrúar í notendaráðum. Þessu fólki þarf að tryggja stuðning til þátttöku og gera ráð fyrir kostnaði til þess. Mikilvægt er að með notendaráði starfi fagaðili sem heldur utan um skipulag og getur veitt alla þá aðstoð sem til þarf.

Eitt af þeim verkefnum sem notendaráði er falið, er að veita umsögn vegna starfsleyfa til þeirra sem hyggjast veita þjónustu samkvæmt lögum. Við veltum fyrir okkur hvort það sé heppilegt að tilvonandi notendur þjónustunnar komi að því að veita umsögn vegna starfsleyfa til þeirra sem hyggjast veita þjónustuna. Eins teljum við mikilvægt að leiðbeiningar þurfi að vera skýrar um hvað beri að hafa í huga við veitingu slíkra umsagna.

Í 5.gr. er fjallað um að tryggja skuli þátttakendum stuðning og þjálfun til virkrar þátttöku í samráðshópnum og notendaráðum eftir þörfum. Hvernig hyggst ráðuneytið tryggja þennan stuðning og þjálfun til þátttökunnar? Nauðsynlegt er að leggja til fjármagn til að faglegur starfsmaður sé á launum við að halda utan um notendaráðið og leiða vinnu þess líkt og við erum að gera á Suðurlandi en þroskaþjálfari á vegum Fræðslunets Suðurlands heldur utan um ráðið. Hvað er átt við með þjálfun, er það almenn fræðsla eða námskeið? Þjálfun þarf að fylgja fjármagn til að standa straum af fræðslu.

Virðingarfyllst f.h. Þjónusturáðs á Suðurlandi

Guðlaug Jóna Hilmarsdóttir, formaður